

# PASTOR KHUTCHOI BU



Kuki Baptist Association Nagaland

## “ Keima hi kelngoi ching pha kahi ”

John 10:11

Published by:

Kuki Baptist Association Nagaland

Mission Centre: Khaibung

P.O: Medziphema-797106

Dimapur, Nagaland

1<sup>st</sup> Edition 2006

2<sup>nd</sup> Edition 2014

Thumakai: (Exe.Secy)

Asunga thu umho: (Contents)

### TAHSAN PHONDOH

Keiman Pa Pathen Hatchung nung Van le Leiset sempa katahsan e;  
A chapa chang khatseh Jesu Christa Lhagaotheng a kona kijila;  
Nungah thengsel Mary sunga peng, Pontius Pilate khut a genthei hesoh thohpa;  
Thingpel a kikhen beh a thia lhana kivui pa;  
Nithum lhinnia thina akona thoudoh kit pa;  
Vanna kaltouva Pa Pathen Hatchung nung jet a toupa;  
Vanna kona mihing le mithi thutanna hung kit ding pa chu katahsan e;  
Keiman lhagaotheng katahsan e;  
Vannoi losoh houbung theng khatseh;  
Mitheng te kiloikhom pi na chu katahsan e;  
Keiman chonset kingaidam na katahsan e;  
Tahsa pumpi thodoh a tonsot hinkem louva hinna katahsan e,  
Amen

**BUNG-1**  
(Pastor Kiti)

### **Pastor min umdan leh anatoh ding ho:**

Hebrew leh Greek Bible a chun, Pakai kelngoi ho vahpa tina ahi. Kakelngoi sucheh a suse ho chu ada hiuhen tin Pakaijin aseije, Pakai Israel te Pathen in akelngoi ching Pastor ho douna in hitin aseije, ka gan gol ho nasucheh taovin, na nomang gam kei un, amaho lah nagavil kha hihun, veuvin nathilbol phat lou hou chu kahungvil ding ahi tin Pakai jin aseije. (Jer.23:1-2)

### **Pastor in abol ding ho chu:**

1. Lhagao an a kelngoioh vah (Jn. 21:15-17, Sol.20:28)
2. Chonse lamvaiho Christa koma hinle puikit (James 5:20, Daniel 12:3)

3. Lungset naleh ngailutna a amangsaho henga thuhil (Ps.126:5-6)
4. Lungneng tah leh ngailut to thoa midang ho athemmo nao hilchet peh a tilkhou ding (2 Tim.4:2)
5. Thudih tah leh kihilna pha atuhjing diu (2 Tim.1:13)
6. Pathen jalouna, hou seiset thumot sei kinelkalna akona kihei mang ding ahiuve (1 Tim.6:20)
7. Jalhang a leh intin achot uva ahil dingu ahi (Sol.20:20)

**Pastor lolhing ahina dinga thilkhoh ho:**

1. Ginchat umtah leh tahsan umtah hina (Sol.20:26-31)
2. Kithem chuh na leh lekhasim na a pon pan ding (2 Tim.2:15)
3. Pathen lekhabu Bible mangcha a thusei (1 Cor.2:2-5)
4. Hetchetna (experience) (1 Jn.1:3,4:14)
5. Pathen khohsah na (1 Pet.1:15-16,3:3-4, Mat.5:16)

**KELNGOI HON:**

Chuteng nakelngoi te,keihon akhang akhanga,Nangma vahchoi uving ting,Tonsot geija nangma kathangvah diu ahi atiuve (Psalm 79:13)

**HOUBUNG PASTOR HO MOPOHNA:**

1. Pathen Houbung chu, anpha, thupha, langei, taona a avah ding ahi.
2. Naosen alhan ding, Mithi avui ding,neito thilpeh ho alhan ding,damlou ho ataopeh ding ahi.
3. Taona, thilpeh, lasah, thuhil, kikhop, gunchu tah a pang ding ahi.
4. Houbung sunga kina, kinel aumle chamna asempeh ding, insung maicham jong asempeh ding.
5. Houbung sunga, khosung a,vang phat ni,vangset ni a houlim them ding ahi.
6. Houbung chu ngailut na neitah a vai ahoma alamkai ding ahi.
7. Ama chu chon phat kisin sah na a kithu nun na, lhagaova dim a,hinkho theng mang a mi-vet jui theija um ding ahi.
8. Houbung mijat ahethetei ding, a-lhagao dinmun u jong ahethetei ding ahi.
9. Houbung sunga lahlut ding leh vetna koi ding ho chu Deacon Board in avetchil masah uva chujou teng le bou kin chu abol ding ahi.

**BUNG-2  
HOUIA NAOPUI NA**

**Naopui dan:**

1. Anu leh apa umlou ho, api leh apun apui thei ahi.
2. Anu thi apan apui ding, apa thi anun apui ding ahi.
3. Anu le apa adam uleh anilhona apui lhon ding ahi.
4. Naopui naphat hi jingkah lam hiding ahi.
5. Naopui ding chu, anu leh apan, Houbung Secy ahilou leh Pastor pa ahetsah masat ngai ahi.
6. Naopui na a thilto (Maicham) hi bol ding ahi.

**Naosen lhan na:**

1. Naosen chu apen nikho,amin toh,anule apa min toh Pastor apeh diu ahi.
  2. Pastor in nao lhan na kin aman teng leh Houbung sunga naosen pengthah ineijeh uvin,Pathen thangvah in um hen ati ding ahi.
  3. Anu le apan naosen chu Pastor koma ahinpui lhon a,Pastor in thudohna hitia hi aneiding ahi.
- a) Pathen goupeh nachapa /Chanu hi Pathen henga lhan dinga naphal lhon hinam?

- b) Hiche nachapa/chanu hi aman se le pha akihet kahsea Pathen thua khou khah a setna lah a veng bit dinga nakitep lhon hinam?
- c) Houbung chenna lhongpi toh kitoh a nakhou khah jing lhon ding hinam?

Pastor in hitia hi alhan ding ahi:

4. Naosen chu Pastor in pom in tin hitia hi aseid ding ahi..

a) Nang (naosen min aseiding) Nanu le na pan Pathen maichama nahin puilhon tah jeh in, Tonsot Pathen chu nachungah Nisa bangin vah jing taken

b) Lim le melpu a nahin gongdoh Pathen chun, nalhagao huhhing na, natahsa damtheina Chihna, Thepna, Haosatna, lhingset in phat thei naboh taken tin kei (amin aseid ding) Pastor Amen. Bible chang (1 Sam.1:11-23; Mk.10:13-16, Lk.2:22-32; Ps.127:3)

### **BUNG-3**

#### **TWI A BAPTISMA CHANNA**

Twi a Baptistma chan hi nidang laiija lunghei na dinga ana bol u chu hitalouvin, mipeng thah atahsan te jouse chu twija phuma Baptisma chang ding ahi. Hiche Baptisma chun Jesu thi lim leh thokit lim avetsah na leh melchihna ahijeh in, Houbung mite gelkhoh ding khat chu ahi. Atah san a Baptisma chang chu sohcha ding ahi. (Mk 16:16, Sol.2:2)

#### **BAPTISMA CHANSAH DAN:**

#### **BAPTISTMA CHANG DINGA KITHUMNA:**

1. Koi hileh tahsan na a pilhing jouse chu Twilut dinga kithum ding dan:

(a) Pathen angung leh Houbung angunga Twilut ding kanom tai tihet na a Houin kaikhom na a kam chenga aphon doh ding ahi.

(b) Christa a hinkhothah neilou ho chu Twilut sah lou ding ahi.

(c) Pastor hon phatah a twilut thei ding ho chu counseling class aneipi ding ahi. (Matt.3:13-17, Mk.1:9-11, Lk.3:21-22)

#### **HET DINGA PHA**

1. Nang man chonse kahi ti nakihet em? chuleh keima jehin Jesu tha in aumin, them kachan na dingin mithilah a konin athoukit tai ti natahsan em?

2. Jesu Christa hi na huhhingpu leh Pathen Chapa ahi ti natahsan em?

3. Twi Baptisma hi hinkho thah lampi jotna ding leh, phum lut a chang ding ahiti natahsan em?

4. Pathen khatseh, Apa, Acha, Lhagaotheng hi thilsem jouse sempa ahi ti natahsan em?

5. Jesu Christa hi mithengte puija hungkit ding ahiti natahsan em?

6. Vanthah le leithah, Gotmun meidil atahbeh a um ahi ti natahsan em?

7. Nachonset na ho ngaidam na nakihet tah a Pathen toh kichamna nanei tah am?

8. Houbung dan holeh chonna dan ho najuija naja bol ding hinam?

Baptisma hi achang ding leh achansah ding akibang pon ahi. Mi ama changin Baptisma achang thei pon ahi. Achansah ding Pastor chun Pakai Jesu Christa'n solchah ho asolna banga chu, Apa Acha, Lhagaotheng mina chu Baptisma achansah diu ahi. (Mt.28:19)

Baptisma channa ding chu Twija phuma Baptisma achansah ding ahi. Achang jouse chu ahung doh teng uleh ponkang khat cheh silpeh ding ahi.

#### **BAPTISTMA CHANG HO HOUIN A LAHLUT NA**

Sopite ho, tunia kipatna hi houbunga Pathen mite toh kiloi khomna muna, pilhing dinmuna dinga phon dohna leh lahlut nahi taove, ti vetsah nan Baptised member jousen khutjet lam domu hite. Tua pat na nang ho cheng hi nopni, dani, phat jouse a Houbung mitheng ho lah a lhalut a toh mun leh pan mun chang khom ding nahitaove tia Pastor in phondoh na kanei tan ahi, ati tolhona ama ho dinga kipathusei na leh vang thumpeh na Pathen henga taona a khumkha ding ahi.

#### **BUNG-4 PAKAI ANTHENG JON**

Pakai Antheng jon kiti hi, kivailhah na An-kong ti a jong lahthei ahi. Hiche An-kong hin ipi avetsah ham? ti chu Jesu hungkit kahse a dinga ama thina hetjing na ding leh phondoh jingna ding thupeh poimo tah chu ahi. Pakai Jesu matsah ding jan chun aman changlah alan athangvah jouvin ahehbal bal in hiche katahsa nangho dinga kipe chu ahi neigeldoh jingna dingun bolun ati. Chuti chun lengpitui chu alan hiche hi nangho dinga ka thisana kitepna thah chu ahi. Changlah naneh uva, khona jong nadon laichan seuva Pakai thina chu na phondoh u ahi. Amavang mi ama kikhohlen lang nehen donhen, anehoi hilou ne a donnah chu themmo channa aneh adon ahi.

#### **Aneh dan:**

Ki-nga kim a donkhom a nekhom cheh ding ahi. Adammo ahung theilou ho Deacon Board hon alupna muna apeh thei u ahi. Aval aumleh chapang in aneh theilou ding ahi.

#### **PASTOR AN-THENG HOPDAN (1 Cor.11:25-30)**

- 1) Amasan Pathen thu aseid ding ahi.
- 2) Kithopi ding Pastor leh Assistance Pastor akou ding ahi.
- 3) Antheng chu lhandoh na aneija Pastor teni chu khatkhat a ahop sah ding ahi.
- 4) An-theng chu semtup sa a dokhang chung a pon khusa um ding ahi.

#### **BUNG-5 PAMCHANG LE LAHLUT**

Houbung sunga pamchang a umthei ding ho chu:

1. Houbung chena lhongpi kal a natong
2. Jon le kit jeh
3. Hou dan louva jinei
4. Kham na thei thil a kingolsah
5. Haosa anga salam sat/themmo changho
6. Atahsan pailha
7. Toltha jeh
8. Lamkai kupal aumtah leh apam chan na ban a anatohna term khat (2 yrs) khongaisah ding ahi. (Matt.18:15-17, Lk.7:3, Jn.20:23)

Hitobanga chon ho chung a chu Deacon Board in ngaito uvin tin, athu luh nao chu Pastor pa peuvin tin, Pastor in pamchang kin chu abol ding ahi. Pastor'n sopipa, sopinu hi houbung chon na kala achonset, (1Cor.5:3-5) tahjeh in Pakai nikho a alhagao huhhinga aumtheina ding in, dan pama akipe doh tai, akisih a ahung kilekit kahsea ding in, tin houbung mite angung ah kaphong doh e tia taona aneipeh ding ahi. Pamchang jouse hi akithum nia konin lhathum (3 months) sung ahinkho vet in apha.

#### **HOUBUNG A PAMCHANG HO LAHLUT NA:**

Koi hijong leh Houbung sunga pamchang umho chu Houbung in aphot ateppeh toh kilhonna, ama kishna dung juija Houbung mite leh Pathen angunga ngaidam athuma akish na chu, Deacon Board in ngaito uvin tin pha asah uleh lahlut dinga thulhuh na asem diu ahi. Pastor in sopipa, sopinu, hi amakish na dung jui leh Deacon Board in aphal na toh kilhonin Houbung sunga lahlut ahitai tia Houin kaikhom na a aphon doh ding ahi.

### **MITHAH LALUT DAN**

Houbung choma hung lut aum tah leh (Transfer Certificate) aumna Houbung akona ahin kipoh ding ahi.

Pastor in lahlut na dinga athudoh ding ho:

(a) Houbung a donle kai hihen, Houbung chon dan jouse hi Pathen mina najui ding hinam?

(b) Pathen hou kaikhom naleh kiloi khomna dang dang hohi najui jing ding hinam?

(c) Thilpeh thua hopsom leh tolompeh napeh jing ding hinam?

Hicheng thudoh ho akichai teng, aman nopna aneileh mipin khut jet dop a lahlut na anei diu ahi. Pastor in Pathen henga kipa thusei naleh vang thumpehna anei peh ding ahi.

### **EIMA HOUBUNGA KONA POTDOH HO:**

Houbunga kona apotdoh ding mi aumtah leh Transfer Certificate peh ding ahi. Phate cha vailhah na neipeh a, ache na a phat thei achan na dinga taopeh ding ahi. Ijem tia hung kile kitna aneitah jong leh kipha lam louva lemdia vailhahna nei ding ahi.

### **BUNG-6 ANTHAH LOP**

Houbung in kum khat sunga anatoh nao, Lou Gaso ho kipa thu seinaleh gamasa ho Pathen na lhana leh pehdohna nikho khat man ding ahi. Hiche nikho chule nupi hon loulaija muchi kitu jouse chu lakhom uvin tin, Pathen maicham Houin a apoh lut diu ahi. Pastor in kipa thu seinaleh lhana nei ding ahi. (Lev.23:9,10. Cor.9:6, Ps.96:8)

### **BUNG-7 KICHENA THENG**

Houbung sunga danthenga kicheng ding aum teng leh hiti ding ahi. Hapta khat sunga alang to a HOUIN na lekha kitah ding ahi. Hiche lekha chu akicheng ding teni chung a lhina lel na kicheh tah he hon abolhah diu ahi. Ajeh dihtah written jihtho a Deacon Board apeh ding ahi. Deacon Board in ngaito intin adih leh danthenga kicheng theilou ding ahiuve. Amavang engset mana suhminset ding dei jeha kibol ahivang leh athu chu kilalou ding, Hitobang abolpa ham? abol u ham chu vetna umding ahi. Ahin, athuchu adih nah leh amani chu Danthenga kicheng thei lou diu ahi. Hichu Deacon Board khut na kingam ahi. Hiche kintheng kiman na dinga Kin Thempu a pang ding ho hetpeh na le phatsah na anikho leh kimanchah ding gon ding ahi.

### **HOUIN NA KICHENA THENG KAIKHOM:**

#### **Kichena theng:**

Kaikhom chu Pastor ahilou leh Asst. Pastor in Chairman hintin, Seiding khoh ho aphon jou phat leh kinbol ding Minister pa khutna phat ho apeh doh ding ahi. Moute ahung lut phat uleh a jana mipi ding ding ahiuve. Minister pan phat lan tin, lekha kitah ho leh akicheng ding teni phat seinaleh lekha ho Church Secy pan mipi lah a asim doh ding, hiche lekha chu Minister pa apeh ding ahi. Aban chu kin Thempu pan ajona chan a apui ding ahitai.

**BUNG-8**  
**NUPA KICHAM CHEN SUHDET**

**Nupa kicham chen suhdetna:**

Kiti chu Houbung sunga danthenga kicheng louho tina ahi. Danpo a kona lahlut ahiphat uleh Houbung in program sem intin, Pathen min na Pastor khutna kicham chen suhdet na anei diu ahi. Amun chu Houin hiding ahi.

**BUNG -9**  
**NUPA KIHEN**

Houbung sunga danna kicheng tapou chu kikhen lou dinga Pathen tupeh ahi. Ahivangin mihem ho lah a hin kikhena aumtei ji in ahi. Hitiho jouse chu anoiya bang hin Dan aume.

1. Jon jeh tailouvin, Bible in koiman aji dahih hen ati. Da-theija um numei/Pasal chu akida a ahileh akichenpi jong chu ajong ah ahi. Ajong lou, akida lou joh chu dan thenga jinei kit thei ding ahi.

2. Thildang jeh a kikhenna chu auma ahileh ajinei masa joh chu mo akipoh ding, Anukhah joh chu danthenga jinei thei kit ding ahi. Amani chu kihoucham hen kicheng kit uhen hichu thilpha ahi.

**BUNG-10**  
**HOU-IN KOT HONNA**

**1.Hou-In mun chana:**

Hou in mun dinga Deacon Board in agon nao chun Pastor in tupeh chu choi intin, hitia hi aseid ding ahi. Patoh Chapa toh, Lhagaotheng min in hiche in mun hi Hou-In theng sahdo na mun ding leh amintheng vahchoi na dingin hiche leiset hi amun chanan katu keh e.

**2.Hou-In ning Songphuna:**

Ordain Pastor in Christa chu In ning song ahidan ho sei in tin, Songkiphu na dinga kilaihom sunga chun Song chu tung in tin, hitia hi aseid ding ahi. Pakai jin Peter komah hiche song chungu chu ka Houbung kaphu ding ahi ati, in sahon adeimova apai u song chu aningah apipen in apang tai, hichu Christa ahi. Hiche In ning songa kona Houbung kivaikom ding vetsahna in keima Ordain Pastor in Patoh, Chapa toh, Lhagaotheng min in kaphut e taona anei ding ahi.

**3.Houin kot honna:**

Hou-In chu akisah jou phat leh kot hon na umin tin, Hou-In tol ah kikhopna um ding ahi. Pastor in, Hou-In thu ah houlim na nei in tin, ajophat leh Pastor khat taona nei dinga akou ding ahi. Hou in kotna chu Ribbon khat kaisalsa a umding, Bahche khat jong koisa um ding Ordain Pastor in hitia aseiding ahi:

**Ordain Pastor in hitia aseid ding ahi:**

Hiche In hi Pa toh Chapa toh Lhagaotheng ihouna dingu leh ikiloikhompi na dingun, Jesu Christa mihuhhing na kipana thupha seinu in hiding in, atahsan ho Pakai thua kilhamon na, kisuh hatna dingin, chonphat naleh ngailutna, punsahna dingin chuleh Pathen gamsuh let na leh machalsah na dingin Pathen henga a kakatdoh in ahi Amen.

Hou-In sungah chun Ordain Pastor pa lutmasan tin, mipin anung ajui diu ahi. Pastor in hitia hi aseija mipin adonbut diu ahi.

**Pastor in:**

Vo kelkot jouse nalu khangsang uvin, Vo khang luilaija kisemsa kotpiho kihong len nun. Loupina lengpa chu ahung lut theina ding in, Hiche loupina lengpa chu koi ham?

**Mipin:**

Pakai thahat tahleh hangtah galmun na thanei pen Pakai ahi.

**Pastor in :**

Vo kot jouse nalu khang sang uvin, Vo khang luilai ja kisemsa kotpi ho kihong lennun Loupina lengpa ahung lut theina dingin lou pi na lengpa chu koi ham?

**Mipin:**

Thanei pen Pakai amahi Loupina leng ahi.

Pastor in:

Tunin hiche in hi Pathen Hou-In ding in kapedoh taove, mipin Amen ati diu (Lk.19:-45-47, I Kings 8:12-13, II Cor.6:1-7, Psalms 24:7-10, Gen.28-22)

**BUNG-11  
MITHIVUINA**

a) Athi nu ham/ Athipa ham chu Hospital a Doctor in aphon doh banga Houbung/Khosunga Houbung mi athi aumtah leh Pastor/Asst.Pastor amani aumtah louleh Deacon ho khat pen pen in Taona aman a sopinu/sopipa hi atahsa leh alhagao kikhen a ahitai tia taona aman jouteng, thidah voh dinga Houbung chowkidar/lhachapa sol ding bou ahin. Member khat mai maijin thidah voh dia sollou ding ahi.

Houbung sung leh khosunga mithi aumteng leh pilhing hihen naosen hijong leh Houbung register a amin kisun lut, Pastor in lhan doh na aneisaho chu Houbung in thidah akhet peh uva, Programme hi Houbung in alam kaija chuleh ainsung miho toh kihou toh uva kitup tah a asem diu ahi.

Thivui hi church pastor ahilou leh assistant Pastor in avui ding ahi. Hiche nikho leh Houbung lamkai jouse aumchek apha, ajeh chu houbung programe ahijeh in Houbung mite jouse lhahdoh na kin mithi te ina lhamon ding apha. Itobanga thi hijongle Pastor in avuidin apha. Pamchang pet a thi hile ama kitha ho jouse chu akong chung a Cross aman akipuh ding ahi.

**b) Naosen Vui ding dan:**

Chapang lha khat, lhani, lhathum bepma hinkho lem aumtah leh Houbung mipi thalhenga Houbung deacon khat in aga op muva akoi doh thei ju ahi. Ijem tia Houin na akipui lou chapang ahikhat tah leh Houbung thudol avang na kitong thei lou ding ahi. Insung mipa le atu a be Houbung lhacha hotoh kihou toh dolla akibol dui ahi. Thidah jong vohlou ding ahi. Ajeh chu thidah akivoh leh Houbung leh khosung pumpi kihetsah a kikoun ahitah jeh chun a insung lhacha hon اساس dui navah na joh/bailam jonte.

Thempu pa chu houlim na thuseina nei in tin, ajophat leh lhah dohna kin chu hita a hi anei ding ahi. Sopi nang hi pathen in natep peh nahin kho lhin toh kilhon in hiche Inn hi nadalhah ding ahitai. Nalong damsah houpi theilou ahitah jeh in nalhagao khutna sahlou van Inn noma cheng dingin na ngailut na insung mi, na Houbung mite toh keima Pakai lhacha Pastor in hiche pon In toh bang leiset inna kon in Pakai Jesu Christa min in kalha doh tan ahi. Amen. Taona anei ding ahi.

**Lhana mithivui na kin:** In na kona lhahdoh na kin akichai phat leh lhanmol a vui ding Thempu pa ahilou leh Pastor/Asst.Pastor chun Crosss puin tin, mithi long in anung ajui ding mipi anunga che ding ahiuve. Lhankhuh sunga thilong chu kitup taha a kojou phat leh, Thempu pan houlim na anei ding thokit thu ho mithi umdan ho chomcha aseiding ahi. Chujou phat leh thivuina kin chu hiti ahi aseiding ahi.

Sopi nang...hi natah saphe kicholdo dingin lhankhuh sungah kakoi taove. Leisetna kila a kitem natahsa chu, pakai Jesu Christa thisena chohsa nahitah jeh in monmong theije kitu nahin, monmang theilou kaithouva na um ding ahi.

Tahsa vouna kitu nahin, Lhagao vouva kaithouva naum ding ahi. Thokit nikho a Pakai angunga kimukit dingin keima pastor in Patoh, Chapa toh, Lhagaotheng, minin kavuitai koitobang along kimulou vuina kin kibol chu leilhang lhansunga chu selut ding ahi. Alhahna

a mipin ban aphal dui ahi. (1 Cor. 15:35-45, 1 Thes 4: 13-18, John 14: 1-2, 1 Pet 1: 24-25, Jacob 4: 14, Psalms 90: 5,6,9,10, 23: 4,5, Job 19: 25-27, Rom. 8: 35-39, Dan.12:3, II Sam 12:23, II Cor. 5:1, Phil 1:21, Rev14:1, Is 26:19) koito bang ama leh ama kithat, kikhai lih , chon hoilou tah a thi aum chun Pastor in avuiu theilou ding ahi.

### **BUNG-12 CHEN NA IN KOT HONNA**

**In kiti chu:**

Mihema dinga ngaichat khohpen khat chu ahi. In na chu Pathen loupina le damtheina, vang phatna, alhun theina dinga chu Pakai Pathen min panna hon angaijin ahi.

1. Tunin Sopite, In hi Pathen loupina in, damthei na in, tahsa Lhagaova goukholna in, vang phatna in ding leh
2. Pathen toh chenkhom na in ding in keima Pastor in Pakai Jesu Christa min in kahonge, tia ribbon chu achetan ding ahi chuteng leh in lhandoh na a taona aman ding ahi.

### **BUNG-13 LHAN SONGPHUNA**

**Khosung le Houbung sungah:**

Lhansong phut ding aum thei leh hiti ding ahi. Lhansong phung ah chun kikhop na umin tin, Song phut ding Pastor in houlim na leh taona nei in tin, Chujou leh hiti a hi aseiding ahi. Sopi nang hi nalim namel kimu tahih jong leh nangma mela mu dingin, hiche pon hi kahoh doh in chuleh Pakai Jesu Christa min in hiche song hi nangma hetjing na ding in kaphut in ahi. Song chungu thu kisun ho chu asimdoh ding ahi. Phat chaina Pastor in Benedication anei ding ahi.

Amapa, Amanu, thusim seina jong umding ahi. Apat, ahat na ahou satna, athanop na, ho adang dang hojong seithei ahi. (Josh 4,2-7, Gen,35:14,15.28:18.31:13)

### **BUNG-14 NEITO THILPEH KILHAN:**

**DEICHOM MAICHAM THILTO:** (Gen.22;1-19)

Maicham thilto umdol hi Pastor in mipite ahetsah din aphai. Tulai jin Pathen thutoh kitoh louvin Maicham thilto jong aumjin ahi.

Deichom Maicham thilto ho:

1. Damlou vetna Maicham
2. Lolhin na Maicham
3. Pennikho (Birth Day) Maicham
4. Vailhah na Maicham chuleh adang dang

Houbung sunga koitobang ham chun neito thilpeh ahin choija maicham a ahin peh chun Pastor khat chun alhan ding ahi. Thillhan kiti hi thillhan kiti hi Thempu kin dan ahijeh in, mijouse moh lhansah ding ahipoi. Pastor umlou na a chu Asst. Pastor ahilou leh Deacon khat in alhan ding ahi.

### **BUNG-15 HOUBUNG SUNGA LAMKAI KIKAT DOH DAN**

Houbung khat a Pastor chu Ordained Minister/Licenciate Pastor khat in akat doh ding ahi. Houbung bah chom chom a lamkai ho chu Church Pastor in akat doh ding ahi.

**Church Pastor in akat doh ding dan le akatdoh ding ho kom a asei ding chu:**



Sopi deitah teho, Pathen chenna intheng a, lhacha natong dia eikou nao geldoh jingu hite. Pathen in Houbung a dinga, bol theina jat chom cheh natong dinga lhendoh nahiueve. Pathen minloupi na leh tahsan uma toh doh theina ding in mipi ten jong kithopi khomin, taopeh uhite.(Eph.4:1-6, 2:8-9, I Cor.12:4-5, Rom.12:1) Katdoh ding ho chu dinsah ding ahi. Sopite nang ho, nangho atum nahi tapouve, man a kicho doh nahitaove, natahsao leh nalhagaovin, Pathen choi an un, nang ho aum thilpeh chu lha kang hih un. Mipi din sah ding, sopi te ho Pathen leh alung setna thudol a nakivop sah u thuho chu nakhan sah dingu ahi. Lamkai got chom chom a kilheng doh ho houbung a natoh khoh tah tah lamkai ho kithopi dinga tahsan umtah a kakatdoh nahi taove. Pakai amatah in lhagaotheng in umpiu vin lang hatna thah nape jing taohen Amen. Achaina taopeh ding ahi.

## **BUNG-16 TAHSAN BULPI**

### **1. Pathen thu:**

Bible hi Pathen hu lhakhum ngei ahi ti ka tahsan e (2Tim.3:19,I Peter.2:2)

### **2. Pathen khatseh:**

Pathen khatseh tonsotna um, Apa Acha, Lhagaotheng hi Pathen na mithum chu Pathen ahi ti katah san e (Deut.6:4,Mk.12:29,Is. 29:43; 10:11,Mt.28:19;Lk3:32)

### **3. Mihem chonset a lhahna:**

Mihem chu ama deilhen nan chonset nan alut tai.Hijeh chun mi jouse chonse ahitai Mihem lhatdoh na chu Jesu Christa thisan bou ahi ti katahsan in ahi. (Gen1:26-31, I Pet1:19 Rom.3:10-18)

### **4,Mihem huhhingna:**

Mihem chu chonset kish in,Pakai Jesu Christa tahsan na leh Lhagao thenga thahsem najeh in,Mihem chu huhhing a um ding ahi.(Rom.10:9,Titus 2:11-13-15;Lk.24:47 ,Titus 3:5-7)

### **5. Baptisma chan:**

Baptisma chan hi a tahsan ho twija phuma chang ngei diu ahi.Athi lim banga ithiu, athokit lim banga ithokit diu vetsahna le melchihna ahi ti katahsan ne (Mt.28:19, Rom. 6:1-5,Col.2:12)

### **6. Pakai Antheng Jon:**

Hiche Pakai Antheng jon hi phat tina Pakai hung kit kahse a Pakai thina geldoh jing na ding in bollun ti katah san e. (I Cor.11:17,22,23-26)

### **7. Houbung:**

Houbung chu Christa tahsa ahi. Mitheng te kiloi khomna houbung khat seh chu katahsan e. (Eph.1:22-23,2:22, Heb.12:23).

### **8. Suhdamna:**

Jesu Christa akona tahsan ho chung a suhdamna thilpeh chu umding ahi ti katahsan e. (I Thes.4:16-17, Rom.8:23,Tit.2:15, I Cor.15:51-52).

### **9. Christa kum sang vaihom:**

Jesu Christa leh atahsan ten Israel te chung a kumsang khat vai ahom diu ahi ti katahsan e (2 Thes.1:17, Rev.16:11-14,20:1-7, Rom.11:26-27)

### **10.Gotmun Meidel:**

Diabol leh asolchah te chuleh sahang chuleh themgao lhem ho hinna lekhabu a amin umlou jouse chu hiche meidil a kisp lut ding ahi ti katahsan e, hichu thi ni na ahi.(Rev.19:20,20:1-12)

### **11. Vanthah leh leithah:**

Hiche leithah leh vanthah chu mitheng te kinep naleh kichol dona mun ding chu ahi. Hiche muna chu mitheng ten tonsot hinkem lou aman diu ahiti katahsan e.(2 Pet.2:13, Rev.21:22)

### **12. Thokitna:**

Tahsan thokitna hi mijouse thoukit ding ahi. Hichu lhangpi thokit na ahi. Kimkhat chu tonsot hinkem lou changa thoukit ding kimkhat chu themmo changa thoukit ding ahiuve (Rev.20:12-15).

#### **PASTOR ORDINATION POLICY:**

Kuki Baptist Association Nagaland sunga natong dinga Licenciate leh Ordain bolthei ding ho chu KBA Ordination Committee hon anoiya banga lhenchilna anei dingu ahi.

1. Bible Training ATA leh Serampore University a degree neiho peh thei ahi.
2. Ministry experience kum 5 neiho peh thei ahi.
3. Ama umna houbunga kona seiphat na lekha beija kibol theilou ding ahi.
4. Pastor 3 akona kum 5 experience neihon recommendation abol ngaiding ahi.
5. Ordination Committee ho koma Ministry experience Thesis (jihtho a) 500 words ajih ngai ding ahi.
6. Ordination Committee ho masanga Exam abol ngai ding ahi.
7. Ordination Committee ho masanga dotho a kilhen najong um ding ahi.
8. Pathen Danthenga jinei/kikhutsuina nei mi hiding ahi.
9. Denomination dangin ordain abolho, KBA gamsunga man ahithe i na dinga ordination Committee hon avet chil uva KBA Executive Committee ahilou leh Annual Council tenga hetpehna ahijou teng leh manthei ding bou ahi.
10. CBCNEI noiya tahsan kibah piho, a thempu hina mangnom hon KBA Executive Secretary pa ahetsah masah dingu, aman phalna afeh dung juija bou man thei ding ahi.
11. Ordain Pastor pan na louva a jinei ho kipom lou ahi.(eg. Court Marriage).

BEITA